

VEZENI MOST

Kad jednom dođeš u grad od lišća
da budeš najdraži gost,
vidjećeš kako obale travne
na ruci drže most.

Most vezen žicom svilenom, tankom,
u sedam boja tkan;
ogledalo mu zelena rijeka,
a ukras sunčan dan.


Vjetar ga njiše ko voda čamce,
svezane u plicaku;
rojevi svitaca nad njim se pale,
pa blista i u mraku.

A pod njim čudni orkestar ljeta,
s dva cvrčka u duetu,
oglašava se svake noći,
ljepši od svih na svijetu.

Divnim ga šumom slave vrbaci
prepuni malih snova;
niko mu nije pjevao ljepše
od bijelih bagremova.

Kada nam dođeš u grad od lišća
da budeš najdraži gost,
preći ćeš i ti korakom lakim
vezeni, vitki most.

Nasiha Kapidžić – Hadžić





RAZGOVARAJMO O PJESMI

Pjesnikinja u čijim pjesmama sve svjetluca, treperi, zvoni, prelijeva se duginim bojama, gdje je sve obavijeno pjesmom i svirkom, i priroda, i svijet u njoj sija posebnom čarolijom, nudi ti ovom pjesmom još jedan poseban užitak.

- Koje je ugođaje ova pjesma izazvala u tebi?
- **Objasni stihove:** „Kad jednom dođeš u grad od lišća
da budeš najdraži gost
vidjećeš kako obale travne
na ruci drže most.“
- Šta znaš o mostovima?
- Koju ulogu oni imaju?
- Hoće li te ovaj most odvesti u ljepotu prirode?
- Pokušaj svojim riječima opisati čaroliju koju ti nudi pjesnikinja.
- Kako ti zamišljaš grad od lišća? Koji je to grad?
- **Objasni i stih** – „Most vezen žicom svilenom, tankom,
u sedam boja tkan.“
- Kojim osjetilima doživljavaš slike koje nastaju pred tobom?
- Pronađi pjesničke slike koje su dočarane bojom.
- Prepiši u svesku i one koje su ostvarene zvukom.
- Izdvoji motive u svakoj cjelini.
- Uoč i osnovno osjećanje u pjesmi.
- Razmisli – kada i gdje bi ti mogao/la preći vezeni vitki most?

NAUČI JOŠ NEŠTO

Šta je stih? To je redak u pjesmi. Stih je osjećajna, misaona i ritmička cjelina

ZNAM DA MOŽEŠ

Pronađi stihove u pjesmi u kojima možeš objasniti osjećajnost, misaonost i ritmičnost.

